

ԱՆՊՏՈՒՂ ԹՉԵՆԻՆ

«Պարտիպպանը իր այգում մի թզենի էր տնկել. և երբ պտղի ժամանակը հասավ, նա եկավ նրա վրա պտուղ փնտրելու ու չգտավ: Այգեգործին ասաց. «Ահա երեք տարի է, որ գալիս եմ այդ թզենու վրա պտուղ փնտրելու և չեմ գտնում. արդ, կտրիր այդ. ինչո՞ւ է հողն սպառնում»: Այգեգործը, որ շատ էր աշխատել այդ ծառի վրա, խնդրում է. «Տեր իմ, նրան այս տարի էլ թող, մինչև որ նրա շուրջը փոքեմ և աղբ գցեմ. գուցե թե պտուղ տա, ապա թե ոչ՝ մի տարուց հետո կկտրես այդ» (Ղուկ. 13:6-9):

Տանտերը՝ Երկնավոր Հայրն է, պարտիպպանը՝ Հիսուս, իսկ անպտուղ թզենին՝ այն ժողովուրդն է, որը երկու հազար տարիներ առաջ ոչ միայն անտարբեր գտնվեց նրա քարոզած նոր Վարդապետության լույսի նկատմամբ, այլ ընդհակառակը՝ մեր Տիրոջը՝ Հիսուս Բրիստոսին խաչ հանեց:

Եկեք մի պահ մտածենք այն ծառի մասին, որը պտղատու ծառերի մեջ խոշոր ու փարթամ տերևներ ունի, սակայն պտղաբեր չէ: Չե՞ք կար՝ ծում, որ այն իպուր տեղն է սպառնում հողի մի մասը ու արգելք լինում, որպեսզի այլ պտղատու ծառեր, իրենց համեղաձաշակ մրգերով, հարստացնեն պարտեզը ու հաճելի դառնան մարդկանց: Հիսուս ասում է. «Եթե աղբ իր համը կորցնի, ոչ մի օգտակարություն էլ չունի»: Այսպիսի անպտղաբեր ծառերը նմանվում են այն մարդկանց, որոնք պաշտոններն են ստանձնում որևէ ասպարեկում, օգտվում են, սակայն ոչ մի ձևով իրենց նպաստը և օգնությունը չեն բերում նրանց հաջողությանն ու առաջընթացին:

Վերադառնալով առակին, այնպես է երևում թե տանտերը համաձայնվել է ծառը չկտրելու և մեկ տարի ևս խնամելու խնդրանքին, բայց թե հաջորդ տարի ծառը պտուղ տվե՞լ է, թե ոչ՝ շատ էլ կարևոր չէ, որովհետև անպտուղ թզենու առակի նշանակությունը ոչ մի ձևով չի փոխվում, պատասխանը իմանալով կամ չիմանալով:

Ուրեմն, *«Ի՞նչ է սովորեցնում մեզ այս առակը»:*

Առակում պատմվածը պարզ մի խոսակցություն է այգեպանի ու իր տանտիրոջ միջև, որը կարող ենք այսօր էլ գործադրելի դարձնել: Երբ մենք օրերով, շաբաթներով, ամիսներով ու տարիներով աշխատում ենք, սպասում ենք, որ մեր կատարած գործը իր արդյունքը տա և միաժամանակ մենք էլ օգտվենք դրանից: *«Այգեպանն էլ թզենու մի ծառ տնկեց»*, ասում է Հիսուս, *«երեք տարի սպասեց նրա պտուղը վայելելու, սակայն իր հույսը կտրեց, որի համար էլ հրամայեց իր գործավորին, որպեսզի արմատախիլ անի այդ ծառը»:*

Ինչպես առակից տեսանք, գործավորի պատասխանը հետաքրքրական է նրանով, որ նա թելադրում է տանտիրոջը վերջնականապես մի բան քանդելուց առաջ համբերություն ունենալ ու մի անգամ ևս փորձել:

Յուրաքանչյուր հայ քրիստոնյա, կարող է ինքն իրեն հարց տալ. *«Արդյոք ես մի պտղաբեր ծա՞ռ եմ իմ ընտանիքի, իմ ժողովրդի, իմ Եկեղեցու, ինչո՞ւ չէ նաև Հայրենիքի համար, թե թզենու նման անպտուղ եմ, որը արժանի է միայն կտրվելու»:* Իրականում առակը հոգևոր մի դաս է մեր ժողովրդի բոլոր զավակների համար: Խոսքը անշուշտ դրամի, հարստության և ունեցվածքի մասին չէ, այլ՝ հավատքի, եղբայրական սիրո, փոխադարձ հասկացողության և այդ

սերն ու հավատքը շոշափելի կերպով գործի վերածելու մասին է: Դրա համար մեզանից յուրաքանչյուրը քաջությունը պետք է ունենա հանձն առնելու այդ պոհողությունը, որովհետև սիրո ամենացայտուն օրինակը պոհողությունն ու նվիրվածությունն են: Դպրոցն ու Ընտանիքը ինչի՞ են ծառայում, եթե չեն դաստիարակում: Գիրքը, թերթն ու հեռուստատեսությունը ինչի՞ համար են, եթե կարդացող ու լսող չունեն: Ծխական Խորհրդի, Տիկնանց, Երիտասարդաց և այլ Միություններ ո՞ւմ համար են, եթե նրանց ծրագրերին ու միջոցառումներին մասնակցողներ չկան:

Այգեգործի խնդրածի պես պետք է խնամենք, որպեսզի թզենին գոնե հաջորդ տարի պտղաբեր լինի: Պտուղը ինքնիրեն չի հասնում, այլ մշակների ամենօրյա աշխատանքի ու խնամքի կարիքն ունի:

Պողոս Առաքյալը Հռոմայեցիներին ուղղած իր նամակում քրիստոնյաներին խրատում է այս խոսքերով. «Հոգով եռացեք. Տիրոջը ծառայեցեք. հույսով ուրախացեք. նեղության համբերեցեք, հաճախակի աղոթեցեք... համերաշխ եղեք միմյանց հետ. դուք ձեզ իմաստունի տեղ մի դրեք, մեկի չարի փոխարեն չար մի հատուցեք...» (Հռոմ. 12:12-21):

Ամեն մեկս մի ծառ ենք տնկված Աստծու մեծ պարտեզում: Եկեղեցին փորձում է մեզ հոգեպես աճեցնել ու խնամել, մեզանից միայն սեր ու բարի գործեր սպասելով:

Որով, եկեք այսօր հետադարձ մի հայացք նետենք ու նայենք մեր ապրած կյանքին և մեզ հարց տանք, «Արդյոք բարի գործեր կատարե՞լ ենք, թե՛ թերացել ենք մեր պարտականությունների մեջ»: Եթե թերացել ենք, ուշ չէ, ժամանակ ունենք, ուղղվենք ու պտղատու ծառ դառնանք, որպեսզի պորանանք և Աստծու մեծ պարտեզում, ուր կան հազարավոր ծառեր ու ծաղիկներ, մենք էլ մեր տեղը ունենանք և երբ մեր Տերը գա նրա վրա միշտ լիքը ու քաղցր պտուղներ գտնի: Ամեն: